

NEEMIASHI

Neemiashi iniaventaigakerira itovaireegi

1 ¹Yogari Neemiashi itomi Akariashi itsirinkake ikanti: Antari ishiriagakotanakara Aretajerejeshi 20 shiriagarini ipegakara koveenkari, yaganakara kashiri Kisereo,^a naro nonake anta ivankoku Sosaku. ²Impo ipokake ige paitacharira Anani itentaigakari pashini notovaireegi iponiaigakara Jerosarenku, impo naro nokogakotagantaigakeri aigaatsirira Jerosarenku aiñoegirikara kametikyarikara inagake, aikiro Jerosaren atakerika yovetsikaiganairo. ³Iriroegi ikantaigana: “Aiñoeginiroro, kantankicha yatsipereavageigaketyo kara ikisavintsagakerira timaigankitsirira kara terira iriroegi jorioegi. Ogari otantatsaitakotantarira Jerosaren kantakani otuagetakera. Ogari ashitakomento kantakani okañotakara otagunkanira tera ovetsikaenkani.”

⁴Iroero nokemavakera ogatyo nokenake niraganaka nokaemavavagetaketyo kara nokenkisureavagetakatyotovaiti kutagiteri tera nosekataempa onti nopirinentake noniakera Tasorintsi timatsirira enoku ⁵nokantakerira: “Viro Tasorintsi timatsirira enoku, pairo pagaveavageti pikoveenkavagetyo kara, aikiro pitsatagiropikantaigakeririra tasanoigimpirira ikematsaigimpira, pitsarogakagaigakari. ⁶Maika

nokogake pinkemasanotakenara nokantakanitari noniimpira noniaventaigakerira pomperaneegi iseraereegi. Naroegi iseraereegi arioniroro novetsikaigake terira onkametite, teranika nontsatagaigero pikantagetirira. Ario nokañotaka naro intiegiri maganiro notovaireegi. ⁷Pairotyo nokañovageigaka tera nonkematsatumaigempinontsatagaigakerora pikantagetirira pitsirinkakagakeririra pomperane Moiseshi. ¹¹Maikari maika nokogake pinkemasanotakenara nonkantakempiramaika, nantitari pomperane, aikiro pinkemaigakerira pomperaneegi kogaigankitsirira impinkatsatasanoigakempira. Onti nokogake irishinetaKENARA shintanarira intsatagakerora nonkantakeririra.”

Nantitari pakotiririra koveenkari vino.

Koveenkari Aretajerejeshi itigankakerira Neemiashi Jerosarenku

2 ¹Impogini yaganakara kashiri Nisan^b namakotanakeneri koveenkari vino nopakotakerira. Irirori tera ineimagetenanika nonkenkisureimage-tempara kantankicha maika ineavakenara nokenkisureakara ²ikantutanatyo: —¿Tatatyogakempira? ¿Tatoita pikenkisureakotakara? ¿Matsi ario pimantsigatake?

a 1.1 Kisereo *Quislew*: inti kashiri 9 *calendarioku* evereo. **b 2.1** Nisan *Nisán*: inti kashiri 1 *calendarioku* evereo.

Naro ogatyo nokenake notsarogaveta-nakatyo kara, ³kantankicha nokantiri:

—iNogoveenkarite, nokogake pinkusogamanetakera! ¿Ario garityo nokenkisurea?, pairatamataketari Jerosaren itimaigavetara yashikiigake-narira ikitagaara anta. Ario okañotaka aikiro ashitakomento otantatsaitakotan-tavetaganirira kankakani okañotakara otagunkanira.

⁴Impo ikanti irirori:

—Iroventi ¿tata pikogake?

Impo nro noniakeri Tasorintsi tsikiyani ⁵nokantiri koveenkari:

—Ariorika pinintake viro onti nokogavetaka pintigankakenara noatakitera anta Jerosarenku novetsikaerora pankotsipage ontiri aikiro otantatsaitakotantarira.

⁶Ogari itsinanetsite onti opirinitake inampinaku. Impo irirori ikanti:

—¿Akatirorokari pimpegakitempa? ¿Tyatirika pimpigantaempa?

Impo ikemakera nokamantakerira tyati nompigantaempa ikantake kameti-take noatakera ¹¹ovashi noatake Jerosarenku nogonketaka anta. Impo avisanaara mavati kutagiteri ¹³noatanin-kake ... noneakero otantatsaitakotanta-vetaganirira notsotenkakerora. *Impogini nopiganaa nokantaigakeri notovaireegi* ¹⁷nokanti:

—Maika pineaigake viroegi tera kametikya antimaige, pairatamataketari Jerosaren, ogari ashitakomento otantatsaitakotantavetaganirira kankakani okañotakara otagunkanira. Maika tsamenityo avetsikaigaerora otantatsaitakotantavetaganirira ganigeniri apashiventaigaa.

¹⁸Impo nokamantaigakeri aikiro tyara ikantakena Tasorintsi ikavintsavaageta-kenara noniakerira koveenkari ovashi

ishinetakena ikantakera kametitake nompokakera Jerosarenku. Iriroegi ikantaigi:

—Nani, kametitake. Iroventi tsamenityo avetsikaigaerora.

Ovashi notsitiiganakero nantavageiga-nakera novetsikaiganairora.

¹⁹Kantankicha ikemakoigakenara paniro oronita paitacharira Sanevarete, intiri Toviashi inampina igoveenkarie-gite amonita intiri aikiro arave paitacharira Jeseme, isamatsanaigake-natyo ikantaigakera:

—¿Tatatyo povetsikaiganakera viroegi? Ontityo pikogaigake pintima-shiigaempara kogapage ganiri pikema-tsaigairi koveenkari.

²⁰Narori nokantaigiri:

—Yogari Tasorintsi timatsirira enoku irirotari mutakoigakenane impo naroege iromperaneegi nantavageigaketyo novetsikaigaerora, ario tyara pinkan-taige viroegi. ...

4 ⁶Impo ovashi novetsikaigairo otantatsaitakotantavetaganirira Jerosaren panikya nagataiganaerora, maganirotari yantavagetasanoigake kameti yovetsikaiganairora. ⁷Kantanki-cha yogari Sanevarete, Toviashi, araveegi, amonitaegi intiegiri aikiro Aserorokunirira ikemakoigakena novetsikaiganairora ikenaigake ikisasanoiganaka ⁸isariaiganakenara iripokashiigakenara irapatoventaigake-nara irapakuakagaigaenarora. ⁹Impo naroege noniaigakeri Tasorintsi nokantaigakerira impugamentaigake-nara impo nokantakanityo nosentaiga-kero otantatsaitakotantarira kutagite-riku ontiri tsitenigetiku.

6 ¹⁵Impogini yaganakara kashiri Erore^e ogari kutagiteri 25 nagatai-gamatairotyo. Onti nagatantaigakaro 52

kutagiteri. ¹⁶Impo ikemakoigakenara maganiro kisaviigavetakenarorira timageigatsirira kara itsarogavageigana-ketyo yagamaavageiganaka ipashiven-taiganakara, yogoigaketari inti mutakoi-gakena Tasorintsi nokematsaigirira naroege nerotyo nagaveantaigaarorira novetsikaigairora.

7 ⁷³Impogini yogaegiri saseroroteegi intiegiri irevitaegi iageigai itimageigira. Ario ikañoigaka aikiro shireaigirira ivanko Tasorintsi, matikaigatsirira, tavageigatsirira ivankoku Tasorintsi intiegiri aikiro maganiro itovaireegi iseraereegi iageigai itimageigira.

Esererashi iniavantaigakenerira maganiro itsirinkakotanakerira Moiseshi

8 Impogini yaganakara kashiri ⁷¹ipokaigutaaty maganiro iseraereegi Jerosarenku yapatoitaigakara pampatuiku okatinkatakera osotsimorote otantatsaitakotantarira Jerosaren paitacharira Nia. Impo ikantaigakeri Esererashi iragakiterora sankevanti itsirinkanakerira pairani Moiseshi itsirinkakotakerora ikantagetirira Tasorintsi, irirori intitari gotagantirorira itsirinkakotanakerira Moiseshi. ²Impo irirori iatake yagakitirora iniavantaigakenerira maganiro

surariegi ontiegiri tsinaneegi intiegiri ananekiegi gaveaiganaatsirira inkemai-gavakerora.

Omirinka kutagiteri iniavantakero kigonkero aganakara 7 kutagiteri.

Itsavetakoigakerora iseraereegi yovetsikagisevageigakerira terira onkametite

9 ¹Impogini aganakara kutagiteri 24 yapatoitaigutaaty aikiro iseraereegi ipitashiigakarora kogapage tera isekatumaigempa. Aikiro yogagui-gaka tontaporokiri itiaigakara kipatsiku. ²Iriroegi mataka atake yashirikoiganaka tenige intentagaigaempari terira iriroegi iseraereegi. Maganiro yaratinkaigake iniaigakeri Tasorintsi itsavetakoigakerora magatiro yovetsikagisevageigakerira terira onkametite iriroegi ontiri aikiro yovetsikagisevageigakerira yashikiiganakeririra. ³Kantakani yaratinkaigake anta mavati ora ikemisantaigakera oniavantunkanira Itsirinkakagantakerira Tasorintsi. Impo iniaigakeri pashini mavati ora itsavetakoigakerora magatiro yovetsikagisevageigakerira terira onkametite, aikiro ikanagaventaigakari ineaigakeritari paio yavisaigakeri maganiro.